

退

補

齋

文

存

退補齋文存目錄

卷八

永康胡鳳丹月樵

傳

資政大夫內閣學士袁公笥陔傳

太子少保頭品頂戴體仁閣大學士兩廣總督葉

公家傳

贈通奉大夫施與齋公暨德配贈夫人節母楊太

夫人合傳

贈通奉大夫胞伯父宏齋公傳

郡庠生裕堂從兄小傳

處士蓮西從弟小傳

郡庠生從姪墨林小傳

舟山雅材樓公譜傳

外兄樓際昌傳

張西潭先生譜傳

暨陽琴軒趙公家傳

資政大夫內閣學士袁公筍陔傳

公姓袁氏諱希祖字筍陔號寄生祖某世居浙之上虞父贈公某服賈至鄂始生公既長遂隸漢陽籍咸豐乙卯夏余赴都寓粉坊琉璃街與公比鄰居屬同鄉里耳公名而未面也丙辰再北上供職兵曹時江夏周東珊大令來京謁選往拜之與公值一見如舊相識自是朝夕過從日欸密酒闌燈施瑣瑣譚家世事故余知公為最悉公家漢陽二世與浙中久隔絕親族里黨鮮有知公家世者初公父贈公之在浙也貧無所資而不妄取

與人咸重之為素封家主會計歲時赴鄂久之江漢間人無不知袁先生者閱數年有勸贈公納婦者贈公曰吾遠離鄉國孤身在外為似續計不得不急謀婚娶但未可造次應也踰二年聘娶倪氏而家貧如故惟藉終歲脩脯以養妻孥次年生公始歡然曰吾辛勞半世一無所積其可以慰先人而自慰者惟此子耳贈公生平喜與人談因果遇善舉必贊成之乃天不永年未四十而卒於楚公僅八歲公母倪太夫人撫公哭曰為袁氏綿血食者祇汝耳汝父在能藉脩脯以度日今吾寡汝

幼何恃而不恐欲汝從學則力有未逮吾織汝讀汝其勉之閱三年境益窘時公年十一歲太夫人詔公曰汝父習賈盍繼父業以謀生公曰諾太夫人遂訪贈公舊交而以公託焉始習負米事繼父錢肆公晝則持籌握算夜則勤誦讀同事嫉之讒惑其主公知之哭訴太夫人曰兒終不能習賈兒甯讀書以養母也時年十六歲開戶自課吟詩作文終夜不輟有識公者咸勸公應童子試遂赴漢陽縣具呈入籍縣試點名諸童譁然漢陽令見公狀貌異人大奇之錄公名賁府府試諸童生喧

開如縣試時太守夏公謂諸生曰此生秀氣入骨光彩奪人若入籍漢陽非僅為一邑光也由是攻詰者莫敢言時有為夏公襄校者謂公文宜取第一夏公曰此生采芹如拾芥何必使冠軍以動衆怒乎抑置十名外以鎮服人心院試入學仍第一公之名遂大噪鄂渚云入學後夏公愛其才學以厚幣聘之菽水之資由此稍裕朝夕歸視太夫人起居雖隔一江風雨無間道光丁酉登賢書三赴禮闈不第有勸公留京者公曰吾母在堂何敢久離以增倚閭望乎仍旋鄂就夏公聘以奉太夫

人太夫人為公聘娶張氏性孝順太夫人感時疾與公  
侍湯藥衣不解帶者累日迨太夫人歿殯殮喪葬盡禮  
且謂公曰勿使後時有悔焉者丁未會試公登進士第  
入詞苑庚戌散館授編修充 武英殿 國史館纂修  
壬子大考二等四名升洗馬轉左右庶子侍讀侍講充  
日講起居注官升翰林院侍講學士戊午擢內閣學士  
兼禮部侍郎己未充福建正考官歷署禮工戶刑兵部  
侍郎潔己奉公不卑不亢名噪京師時權貴弄柄擅作  
威福公署侍郎兢兢自守未嘗折節下之且抗疏比之



秦檜嚴嵩為尤甚疏上留中不發庚申夷務蠢動京師  
戒嚴議者欲和撫之公上三疏力爭不得而和議成矣  
辛酉七月

文宗升遐公感恩號慟靡已今

上御極之初公署刑部侍郎兼兵部侍郎時權貴伏誅  
附勢力而流放竄逐者比比也獨公以恬澹寡欲上結  
主知官如故是時朝野肅清君明臣良方期乘時以抒  
抱負詎病起倉猝扁鵲無功於是年十一月初十日卒  
於虎坊橋之湖廣會館距生於嘉慶己巳年十月廿九  
日壽五十有三公精星度推算不爽自計數運將終先

兩月命子攜眷回楚自擬明春請假疏稿已定未上而公歿矣公娶張氏生子一晉太學生女二長適詹事府主簿揚州劉文照次適漢陽劉未嫁卒妾董氏生女二一適湖北候補巡檢福建楊彝庚子一適湖北候補知府安徽朱慰曾子嗚呼公官二品而赤貧終身生一子又短折天之生材如公者不數數觀天之困阨我公者又何其如此之酷耶公性情慷慨在都時家無儲蓄恆負債以濟貧乏己未典試閩中道出東浙凡上虞之宗黨匱乏者欣助之親族孤苦者矜恤之公不自謂好施

而天之報公何竟使善人無後耶公媳江西蔡梅庵太史女明大義未嫁夫死聞訃後歸袁氏守節人重其義余倡首斂金資其衣食為繼立上虞之遠族在京名炳忠之子為嗣嗚呼公有此媳以撫嗣孤待其成人庶可延袁氏之一綫公其瞑目於九原也乎

宛轉附物怛惆切情袁公歿後君為經紀其家至於今不替正瞿公所謂一死一生乃見交情者宜此文之特至也

張炳堃

惟范巨卿能為死友故真切乃爾

林壽圖

太子少保頭品頂戴體仁閣大學士兩廣總督漢

陽葉公家傳

公姓葉諱名琛崑臣其字也曾祖廷芳候選道始由江南漂水占籍湖北漢陽遂為漢陽人祖繼雯乾隆庚戌進士官至刑科給事中世稱雲素先生考志詵兵部武選司郎中以公貴三代皆贈如公官公先世咸懷隱德給諫公性尤至孝嘗刲股療大母疾居二親喪廬墓六年至有枯木重榮燕巢互乳之異鄉人士以為孝感所致朝廷聞而旌之用能集慶篤祐綿綿延大鍾其

祥於公公生而端靜不苟言笑循家法維謹讀書目數  
行下未弱冠中道光乙酉副車詞筆奇奧詭為老宿旋  
充武英殿校錄議敘教諭辛卯舉於鄉乙未成進士授  
編修直清秘堂嘗進禱雨文甘澍應期

宣宗稱

為忠孝所感其受特達知自此始

上欲試以吏

才輟侍從出公為陝西新安知府有能名己亥擢山西  
雁平道庚子調江西鹽法道兼權布按兩使壬寅授雲  
南按察使未一年陞湖南布政使癸卯調藩甘肅丁母  
憂去職服闋補江甯藩司以原籍例迴避改廣東留署

順天府尹辦武閣事丁未始履廣東藩司任公歎歷中  
外二十餘年遇事無險夷鉅細必躬必親壹以答主  
知乎民隱為念故所至輒奏最而治粵為最久得粵人  
心亦最深遂與粵事相終始先是英夷不恭迫換和約  
並索黃浦碼頭為互市地時耆相國主其議以謀公公  
持不可積忤相國意被劾

天子知公可大用就

擢巡撫委以夷事粵東為華夷交匯之區民俗好亂而  
樂禍且承平久蘊孽尤深最號難治戊申英德清遠二  
縣會匪起己酉羅定州土匪又起公率兵剿辦應機立

斷或數月或數十日而賊首鄧十富黃毛五林十八等  
悉就擒殄未幾海疆蠢動公與總督徐公密畫勦撫兼  
施卒能折其牙角潛消逆萌夷酋頻首聽命事聞

宣宗大悅賜一等男爵加太子少保銜庚戌韶州紅  
巾賊倡亂公先事防堵賊不敢騁賞頭品頂戴兼總督  
銜充欽差大臣咸豐壬子真拜兩廣總督癸丑粵城北  
門外三元里紅頭賊又起勢猖甚公晝夜督勦收復二  
十八屬逆首李文茂竄至廣西境內伏誅賊始平乙卯  
春上命以總督協辦大學士次年授體仁閣大

學士無何夷事復變公感

兩朝知遇恩誓以身

報親登夷舶陳說利害詞色並厲夷酋相顧愕眙既恐  
公歸必決計用兵蜂擁挾去涉印度浮海踰數萬里初  
公窺夷酋無就撫意欲死之以酋環守不得間且冀深  
入彼地得其要領歸報

天子俾疆事不至大壞

姑忍須臾活不為匹夫溝瀆小諒卒以事會不諧莫伸  
隱志又大臣義不辱乃絕粒扼吭以卒時咸豐戊午三  
月二十有三日也而公亦由是削職烏虜可哀也已賴  
天子神靈夷酋悔禍兼感公忠義於某年月日



歸公櫬蓋自是而海疆事亦大定矣公其可以瞑目矣  
乎公生平宅心忠厚有祖父風鄉里善舉知無不樂為  
之嘗捐廉俸銀一萬兩修漢陽攔江堤水不為患又以  
本邑文風日熾捐俸銀二萬請廣文武學額二名著為  
例士林頌之弗衰友愛出於天性少與其弟潤臣舍人  
以詩文鳴一時舍人中更家變援例出為浙江試用道  
中塗聞公喪邑邑遂歿配李夫人早卒繼配汪夫人淮  
安瑟庵先生女也有淑德生女三無子以弟子恩頤嗣  
論曰

宣廟之季疆臣負才名赫赫卓有建監者

陸沔陽外公其尤也公與陸皆漢陽府人受

天

子恩皆極重倚畀皆極隆而晚節則皆艱屯偃蹇賣志以死又何其不相謀而適相合歟然陸以封疆故慷慨死公雖從容遲回卒亦殉以一死可不謂克完大節者乎吾旣以悲公所遭之不幸而又未始不為公壯也

寓議論於敘事之中文氣雄厚密縝深得桐城家法其被劫一節若闕而不書則非信史若書而徑遂則失體裁作者據事直書而以委折出之最為立言得體美人細意熨貼平裁縫滅盡針線迹具見良工心

苦 張炳堃

於極難落筆處獨運匠心斡旋工妙論以陸沔陽作  
陪天然配耦而又不失分寸古文中精詣也何國琛

贈通奉大夫施奐齋公暨德配贈夫人節母楊太

夫人合傳

昔孔門四科德行居首而言語政事文學次之記曰太  
上立德次立功次立言周大司徒以三物教萬民而賓  
興之一曰六德甚矣德之重也士不砥德其餘蓋無足  
觀以吾聞見所及誠周於德者其惟吾外祖奐齋公乎  
公施姓諱美輪奐齋其字遠祖崇登宋紹聖乙亥進士  
世居天台五世祖道通始遷永康之塘西至公二十一  
世公祖某考某皆隱於鄉人稱為有德長者公考得子

甚遲生公時喜曰此子品格清奇異日必亢吾宗幼時  
教以四子書輒成誦弗忘迨讀諸經畢不學帖括家言  
勿求仕進事父母以孝聞終鮮兄弟朝夕未嘗遠離比  
長念父母春秋高經理家事以儉以勤居里鄙間見長  
者恂恂如不能言聞人有善必津津樂道之家僅中產  
無贏餘資隣里有急難及孤貧無告者恆竭力相拯卹  
遠近咸德之而公不自知其為德也娶楊氏有淑德其  
歸公家也井臼躬操之澣濯身任之上事舅姑人無間  
言公伉儷甚篤門以内悉委之罔不纖悉具備公嘗語

太夫人曰吾上世耕讀傳家今與汝衣食粗足願積德  
為子孫計不願積財為子孫害也且吾與汝皆過中年  
兒輩漸已成立但得百年偕老以娛桑榆暮景足矣其  
他奚慕為公年甫逾三十遽遭時症以歿太夫人痛失  
所天哀毀骨立環顧膝下泣謂諸孤曰汝父死吾奚用  
生為然吾隨汝父以死則汝兄弟三人妹一人將誰恃  
耶吾願茹苦以待汝等之成人卽汝父亦瞑目矣生子  
三長友諒處士次友勝庠名錦春縣學生封武畧騎尉  
三友時援例授從九職易名平三女一適先大夫雅堂

公孫九紹冲太學生紹言庠名膏道光己亥武舉人金  
華協營千總紹宇紹岐均太學生紹鼎紹昌紹之紹試  
紹泰曾孫十有二元孫三咸豐朝公以孫膏貴贈武畧  
騎尉夫人封太安人同治十年十二月以外孫胡鳳丹  
官湖北補用道請封贈公通奉大夫夫人贈太夫人按  
狀公生於乾隆二十七年壬午三月初一日申時卒於  
嘉慶二年丁巳正月初六日申時享年三十有六太夫  
人生於乾隆二十八年癸未五月初八日寅時卒於道  
光二十六年丙午四月二十五日寅時壽八十有四太

夫人守節五十餘年嘉慶庚辰永康縣學教諭王褒以  
瑤池冰雪匾額道光己酉浙江學政趙復旌表其門曰  
貞操冰清嗚呼有夫人之節而公型于之德益信是足  
傳矣今公族人續修家乘紹宇中表函囑為傳以紀鳳  
丹不敢以不文辭謹敘其梗概以為公之後嗣法且俟  
世之採風者擇焉

論曰晚近士大夫侈言德政吾不知其果有實惠及民  
否也古之隱君子鄉先生身雖不通顯而德積於已行  
及於人隣里鄉黨生則無弗式而化歿則無弗慕而思



非其德之實然者為之耶抑又聞之修德不求報而有德者天必昌熾其子孫符應卒不毫髮爽今如公者殆其人歟殆其人歟

敘事簡當持論篤實此文之以樸厚勝者

張炳堃

以德字作主意有歸宿詞不外散極經營慘淡之文也何國琛

贈通奉大夫胞伯父宏齋公傳

先胞伯諱仁模字良政號宏齋好學士也幼讀書從先  
大父頃刻不離左右及長與先大夫從學於周鄂堂廣  
文性敏慧舉一反三智慮層出質疑問難求其理之明  
達而後已年弱冠補邑博士弟子員鄉試膺房薦者再  
聲名藉藉而屢落繇山遂絕意進取兼以先祖父母春  
秋高日侍庭闈未肯遠往乃援例貢入成均同治壬戌  
以胞姪鳳岡官鄞縣訓導辛未以鳳丹官湖北補用道  
疊遇覃恩貤贈修職郎晉贈通奉大夫伯母李氏貤

封太孺人晉封太夫人先胞伯性至孝與先祖父母隔  
院居雞初鳴候於寢門外問夜安否早起亦如之每飲  
食必舉箸勸加餐喜談古今事凡有關於世教人心者  
輒引一二為考鏡古名臣之躬行實踐者進子姪諄諄  
勗之道光癸未與先大夫及先胞叔析爨居遵先大父  
命也治家嚴肅門以内無詬誶聲且善理家政讀書以  
外惟農圃為要務凡戚友之顛連無告者有無相通未  
嘗稍吝丁亥春建屋七椽在遺經堂之東不事雕飾質  
美而堅几淨窗明點塵不染遇客至煮茗焚香飛觴醉

月倚牆作鄴架藏書若干卷朝夕評賞嘯傲其中致足  
樂也稍暇課兒輩讀琅琅然如金石音嘗語兒輩曰壯  
不讀書老將何為夏日至熱也開卷則涼沁心脾矣冬  
日至寒也吟誦則煖入肢體矣嗚呼是真能好學者也  
娶李氏生子二繼昌郡庠生繼勳咸豐壬子副貢直隸  
州州判女三長適陬山庠生黃彝次適雅川庠生李載  
華三適象珠太學生王治定孫四宗湄郡庠生宗炤太  
學生宗俊廩膳生宗韓幼讀曾孫五汝楫汝言汝榮汝  
華汝嘉卒於道光十四年甲午四月二十六日距生於

乾隆五十三年戊申五月十七日享年四十有七從兄  
礪溪曲體先志凡作一善行輒遜謝不遑曰吾父母意  
也此善則歸親之義也宜乎後嗣光昌藻芹芳馥吾胞  
伯好學之報且方興未有艾也

樸實中有警策語望溪的派何國琛

澹宕

林壽圖

郡庠生裕堂從兄小傳

從兄諱繼昌字卜五號裕堂宏齋公長子也幼讀書惟天資稍魯而強記不忘年長好馳馬挾弓矢技藝過人頗稱驍勇遂棄文習武應童試拔前茅道光乙巳入武庠踰年應試鄉闈咸決必售而性頗恬澹一擊不中遂無復奮志於功名矣事父母孝晨昏定省無忝所生兄弟友恭無間與朋友誠信無欺處鄉黨中尊卑長幼咸以禮將之無矜張猛厲之氣先伯父家豐裕阡陌連疇歿後裕堂兄主家政遵遺命無改於道人以為難能善

理財春耕秋收倉庾盈億家資且倍徙於前丙午冬建屋數楹顏其堂曰迪彝居室不多而結構天然門戶謹嚴窗櫺細緻遷居未及六載而其身歿矣凡家事悉付二弟亦能井井有條猶兄之不改於父也娶施氏庠生文溪公女生子二長宗湄郡庠生次宗炤太學生女二長適前倉庠生張建庸次適在城王文獻孫一孫女一卒於道光二十五年乙巳八月二十四日距生於嘉慶二十年乙亥十一月十九日享年三十嗚呼勤儉立家而不獲永年以享其成使人不無遺憾然而後嗣光昌

人文蔚起彼蒼之報施為不爽矣

不事雕飾一結神味悠然何國琛

真氣流行林壽圖



處士蓮西從弟小傳

從弟諱鳳洲字蓮西春圃公長子也幼讀書稱穎悟與  
余同學有年紫陽四書集註音解義釋五經能熟讀之  
惟諸史不求甚解而用典新奇如已出雖浸淫於古者  
無以過之書法韶秀摹歐陽大小法帖能遺貌取神應  
童子試與余同拔前茅道光丙午張蘭亭太守府試余  
取第四六弟桐村第一弟第五是年余與六弟遊庠而  
弟獨見黜嗣後試必前列顧一衿之難如登天此豈命  
運為之耶不然何優於才而絀於遇也性至孝先意承

志善體親心視諸弟如賓客謙恭遜讓歷久不渝時胞  
弟紫庭赴京會試登武進士第授侍衛京官數年資斧  
告匱家貲患罄無所取求弟獨百計捭擋時寄金以濟  
之體素弱日肆力於詩古文辭焚膏繼晷歷夜半不休  
迨卧病在牀猶手不釋卷卒以心血過耗一病不復起  
今天假之年吾烏能量其學之所至哉卒於咸豐三年  
癸丑十一月十五日距生於道光四年乙酉八月二十  
九日得年二十有九娶樓氏早卒生一子一女皆殤繼  
娶程氏生女二嗚呼彼蒼之生人也吾不知其壽夭也

造物之忌材也吾不知其臧否也夫有才不遇斯亦已矣然上之或享上壽次或中壽得以從容著作爭千秋不朽之名聊足慰耳卽不然死生有數而猶有藐孤以延似續守楹書未始不可恢乃父未竟之志也噫已矣始艱於名繼短於壽終絕其嗣能不痛哉能不痛哉余惜之悲之不禁長言而詠嘆之迺揮淚而為之傳

胎息廬陵篇尾嗚咽淋漓悽當以慨何圖琛

情文悱惻入後頤宕淋漓淚痕滿紙

張凱嵩

中段宕逸後幅縣遠

林壽圖

郡庠生從姪墨林小傳

嗚呼宗湑吾從姪也字墨林號秋舫裕堂兄長子生而岐嶷貌魁梧日以讀書為樂詢以家政不答亦不問凡米鹽瑣屑事未識為日用需也天姿不甚慧而發憤自強有己百己千之志父早逝事母孝一言一動善體親心為母者有是子亦忘其為未亡人矣時祖母春秋高自塾歸侍左右不離如循子職始從學於堂叔蓮西繼受業於張師西潭閱數年制藝盈帙手無難題其氣勢蓬勃理脈清真幾自成一家機杼矣年十九應縣府試

拔前茅己未院試入郡庠為學使者張文貞公所賞識  
曰此卷章句妥適詞旨圓熟是多讀多做者也吾當以  
大器目之噫如天不假年何哉卒於同治二年癸亥八  
月二十四日距生於道光十七年丁酉八月二十一日  
得年二十有七娶包氏生女一嗚呼青年殂謝天乎何  
尤血食誰延鬼也其餒生榮耶一衿而已死哀耶一女  
而已所尤痛者祖母老矣西山日暮既喪子而又喪孫  
而寡母哭子寡妻哭夫形影熒熒撫棺腸斷俯聽呱呱  
聲泣抑又女也非男死而有知其能瞑目於地下耶嗚

呼宗湄吾從姪也不為之傳誰為之傳者然而傳不傳  
未可知矣

沈痛處令人酸鼻後幅哀音急節似昌黎祭十二郎  
文何國琛

落葉哀蟬無此悽愴  
林壽圖

舟山雅材樓公譜傳

樓氏本妣姓為夏少康之裔逮周封杞東樓公其後遂以樓為氏此得姓之始也歷代著於史冊者自漢之樓護樓元及宋樓鑰明樓澄昭昭在人耳目樓氏古多偉人矣今讀其譜系自謂出宋樞密襄靖公昭其實也自譜學不明世族無存紀載鮮據至有子孫不能明其宗祖託名人以自重如瑯琊王氏自云出於王子晉蘭陵蕭氏自謂本蕭何望之皆為昔人所誦如斯譜者亦善矣哉譜中詳述自雅材公以上十三世有好禮公者嘗

開義學於白沙川始居永康之舟山碧湍里曾祖恭庵公郡庠生祖戒庵公貢生嘉慶元年特科舉孝廉方正授州同知考岷山公邑庠生授衛守備生子四雅材公其次也公父中年棄世事母以孝聞與兄弟居怡怡如也家本素封經理家政無積財以充私橐母曰吾年老爾輩分爨而居吾庶幾其少息乎公奉母命召諸弟謀之田宅取其瘠敗者無纖芥競心其善處家庭如此公性厚而和待人恭而有禮族中長若幼與其鄉黨桀驁不馴者見之無不藹然親悚然畏遇疑難紛爭事聞公



至一言遂解其信於族黨如此道光乙未歲大旱人艱  
食公創議率同姓之富厚者行平糶法按時價減四之  
一咸豐壬子歲又飢先捐百金為倡以賑貧乏賴以全  
活者衆族有宗祠將圯重修之復建專祠祀岷山公離  
家一里許規模宏敞行道稱羨之此公之急公好義也  
生平好讀書補邑博士弟子員屢躋秋闈中年無志進  
取猶孜孜於詩古文詞延名師訓迪子姪每遇課期輒  
草一二藝為後生程式嘗曰立意用典切勿蹈空疎也  
晚年嬰足疾不良於行猶手經史不倦此公之好學能

文也公娶徐氏繼娶陳氏生子六人長泰交邑庠生次齊雲侑生三乘漢邑庠生四欽五太學生五鳳修廩膳生六選邑庠生女五人孫十三人長孫錫蕃邑庠生錫芳太學生餘俱以讀書世其家嗚呼以公之積德累仁其子孫必縣縣延延昌熾於後豈僅以芹藻芬芳為燕翼之貽謀已哉異日者人文蔚起上以鳴國家之盛下以增戚鄰之光吾知其流風未有艾也茲因樓氏纂修家乘公子鳳修以狀乞為文丹忝葦誼不敢以不文辭爰作傳以紀之

辭以辨潔為能不以繁縟為巧夸而有節飾而不誣  
此譜得此文可以傳信矣

張炳堃

鋪敘有變化

林壽圖

外兄樓際昌傳

君姓樓氏字際昌諱泰交邑之舟山人離余家五十里與余為內外兄弟道光庚寅余姊歸君家君年始冠入武庠練習技藝昏旦無休息三入武闈不第遂無志功名君性情恬淡丰度翩翩與文人學士遊語言嫺雅不知其為武夫也生平癖好詩書聞誦讀聲輒太息不自已嘗曰吾姿質遲鈍悔不廁士林以博一衿今晚矣縱欲讀書此生其可再得耶君父雅材公盛德君子也母徐氏生子三女三早卒繼母陳氏君事之如生母焉寢

門視膳朝夕不怠數十年無拂逆容無牴牾聲同母弟  
二繼母弟三君視之如出一母友愛之聲播於里黨君  
家本素封克儉克勤不事華飾以粗糲自甘以布帛自  
煖恒與余姊言曰吾體素孱弱無能為也汝來吾家晝  
夜紡織聲不絕佐吾家以有成者汝也且族黨中之貧  
而無告者寒者衣之飢者食之吾均於汝乎是賴也君  
得子甚遲初生一子早殤迨十餘年生子二咸豐甲寅  
春忽染時症病勢危篤彌留時告余姊曰吾中年得此  
二子汝善撫之吾不知其貴與賤也吾期其讀書以成

材也亦不知其富與貧也吾望其服田而力穡也吾家  
僻處山鄉耕讀外無餘事也汝識之無負吾志吾死瞑  
目矣言訖而逝君年四十有五生於嘉慶十六年辛未  
六月十八日卒於咸豐五年乙卯正月十一日長子錫  
蕃郡庠生次子錫芳太學生孫一鳴呼生平好讀書而  
功名以武庠終也素性本寬和而壽數以中年夭也猶  
幸二子者一則芹藻芬芳一則桑麻樂業以無負於君  
之初志者皆余姊之力也而吾猶厚望二子之飛騰雲  
路丕振家聲而俾君之含笑於九原也

退補齋文存卷八

五

藏板  
退補齋

情真語摯可泣可歌  
張炳堃

促管繁絃聲聲酸楚  
林壽圖

張西潭先生譜傳

前倉張氏為邑中望族其地為甌括通衢自咸豐十年  
兵燹後地方蹂躪譜牒散失張氏子孫恐無以信今而  
傳後也有志纂修盛典也凡族中有碩望者或傳或贊  
各繫以文張子拱薇寓書於余囑余為其父西潭先生  
作傳余曰西潭先生幼時受業師也余雖淺陋不敢以  
不文辭按狀先生諱化英字育吾西潭其別號也事父  
母以孝聞家素貧衣食恒慮不足父母憂之先生弱冠  
設帳於里中歲入脩脯資以養父母迨父母年高晨昏



定省未嘗少懈親歿則喪葬盡禮遠近賢之其處兄弟也和而讓門以內無間言子姪之有材者或分任以農賈或嚴課以詩書戶庭中藹然秩然其家法可為後世則此先生孝友之誠也至其立己端嚴持躬正直居鄉黨則無忤處朋友則無欺遇鄰里排解事以片言判之輒釋爭謝過而去世人稱之曰王彥方也非公事不入公門恒以廉隅相砥礪凡官斯土者甫下車必拜拜則一見而已老成持重事不干以私此先生德行之優也先生幼卓犖穎悟過人每讀必數行下迨其長也聞四

書之與義擷五經之精華凌轢三唐浸淫兩漢家貧不能置書向友人借書讀之必擇其精挾其要手鈔成帙以誌不忘嘗曰作古文者必貫通遷固之文作駢體者必熟精文選之理至於諸子百家無不原原本本得其指歸凡與人語言之際粥粥若無能者一質以疑難事如數家珍左宜右有如泉湧水就淺就深此先生學問之宏也年十四負神童名入郡庠為學使者所器重踰年食餼每試必列優等鄉闈膺房薦者七取堂備者二凡讀先生文者必擊節稱賞嘗曰士人讀書揣摩制藝

技至此蔑以加矣屢薦而不售者豈命之未亨歟不然  
天將老其材以晚成也咸豐戊午歲試以恩貢就教職  
未及秉鐸而先生卒矣此先生功名之難也先生之為  
文也下筆數千言倚馬可待其魄力如昌黎其氣勢如  
東坡其情真語摯如廬陵其切響堅光如南豐博覽羣  
書可經可法所著古文四卷制藝四卷駢體文六卷疏  
梧詩草四卷皆經經緯史有功世道之文憶自道光壬  
寅從學時余為之釐訂存稿以待剞劂此先生著述之  
富有如是者先生一生寒素以筆為鋤耒村中子弟來

學者無不循循善誘相與有成武平一鄉文教久衰自  
先生出而從學者衆遊其門者教之以孝弟教之以忠  
信雅不以幸取微名為弟子喜其後館於陬山再館於  
桃溪余與兄弟繼勳鳳洲鳳岡等皆出門下道愈尊名  
愈顯矣此先生教學之篤有如是者嗟乎先生以器識  
重而文藝推倒於一時亦以文藝傳而器識已足於千  
古何徒以成均終老困守青氈天竟何如命竟何如能  
不為之抱恨乎余京宦十年久離函丈甲子夏奉諱旋  
里喜覩師顏年已七十有三矣白髮蒼顏精神矍鑠猶

期鶴算延長以娛暮景詎料余赴滬上先生遂歸道山耶嗚呼痛哉先生書法學魯公與多寶塔逼肖當時所書碑帖屏幅被賊所焚而著作等身亦付之一炬噫此先生一生精血也何其泯滅無存不能流傳於後世耶先生卒於同治三年甲子七月某日生於乾隆五年壬子某月某日壽七十有三生子三長思郊次思祁早卒三拱薇庠序有聲能繼先生之志述先生之事者也余學淺無文郵寄之以登諸家乘俟後采風者畧識先生之梗概云爾

逐段分疏不漏不冗師承所自宜其言之清切乃爾

張炳堃

詳不傷繁質而有味

林壽圖

暨陽琴軒趙公家傳

記曰太上立德次立功次立言三者有其一已足不朽况能兼之者斯世豈數數覩哉暨陽琴軒趙公太學生樂善好施人也祖勝萬公敦仁尚義父中孚公嘗效孟嘗君焚券事遠近德之公建櫟橋於郭塾累石十餘丈屹如堅壁橋畔建郵亭顏曰利濟為旅人蔽風雨所並修橋之兩岸千餘丈以利行人先自明萬曆四年始建石梁至乾隆四十三年圯邑侯常公募資修之道光十五年又圯公出資獨造閱數月告成從此無病涉者道

光乙未復於邑之潘村建萬壽橋又村中有檀溪橋為公父所造嗣因洪水坍塌公鳩工庀材汲汲以繼承先志為事時衆議有願輦石以助者謀諸公公笑曰善與人同吾特不敢請耳計先後所建三橋共費二萬餘金蓋公之立德有如此者邑中創建試院公慷慨樂輸無所吝捐田入儒學為新進儒童冊費則功在文教也丁未歲大飢公出粟以食餓者里黨中全活甚衆則功在救荒也道光辛丑夏公至櫟橋當暑渴甚因已渴以濟人之渴復於郵亭外建屋數楹並割膏腴田權其所收



租息為施茶資自春徂秋歷年不絕則功在行旅也遇  
歲寒製棉衣若干襲老者幼者各量其大小授之鄰里  
有喪事不克舉者則捨棺助之歲費不下萬金而視善  
如飴孜孜不倦則生而貪貪而死者無不蒙其功也蓋  
公之立功有如此者裴子曰士先器識後文藝而公之  
文藝又有不以器識掩者嘗讀其自述一篇落落數百  
言體用兼備使一旦置身廊廟將見在官言官在朝言  
朝必能利博仁人造子孫黎民之福而惜也僅以檀溪  
老耳余聞公在家庭則儼然可畏在鄉黨則藹然可親

至於矜然諾慎交游其言則始終無貳蓋公之立言有  
如此者公德配楊氏生子一茂桂太學生繼配胡氏生  
子二岐山邑庠生象山太學生孫三長澄溪邑庠生餘  
俱幼讀二孺人者事舅姑以孝處妯娌以和主中饋則  
克勤克儉修蘋蘩則致虔致潔殆所稱女中丈夫者非  
耶令嗣馥園與余訂交久以余素悉其堂上行誼也適  
族中續修家乘謀所以傳公及二孺人者徵文於余余  
固辭不獲遂濡筆以應之聊表其萬一云爾

樂善好施四字足概趙公生平文以功德言分三大

節而立言頗少證據妙筆乃能幹旋遂成巨製那得  
不令人歎服何國琛

敘事錯綜有法堆垛化為煙雲大山崇嶺中包無數  
峯巒相為連斷起伏也張凱嵩

退補齋文存目錄

卷九

永康胡鳳丹月樵

贊

水官銅像贊

文房四寶贊

半儒半仕半農圖自贊

五十小像自贊

銘

雲板銘

墓誌銘

亡室鄭夫人墓誌銘

塔銘

正覺寺中興第一祖故正峯大師塔銘

水官銅像贊有引

癸酉六月三日法源上人主正覺寺是日進丈  
室命殿主洒埽大殿於佛龕內得銅像一尊高  
八寸五分灰塵堙塞滌以淨水鬚眉畢現竟體  
完全視之水官像也余曰噫水官為五炁天尊  
道院奉之而正覺寺釋教也此像胡為乎來哉  
且佛龕建自明崇禎間至今二百三十餘年同  
治己巳重修殿宇龕加裝飾並未覩此亦一異  
也然寺中供奉如來觀音地藏諸菩薩不可混

清適高冠山下新建曾公專祠瞿賡甫太守欲  
招道人為住持余曰善哉此像得所矣當俾道  
人爇辦香奉之以見天之降神待時而動亦應  
運而興也因畧識之而繫以贊曰

是曰金精實司水府渾然元氣衣冠古處沈埋地下遺  
落人間金章銅綬土繡苔斑自明迄今二百餘載神兮  
有靈聰明不昧降龍手段元鶴肌膚用行舍藏大道不  
誣

孟嘗好客而客爭附之是像之來其聞君之為佛護

法而至耶噫左矣然君子不使一夫不得其所故亦  
必有以安置之善哉彭崧毓

漢隸秦碑自饒古雅

張凱嵩



文房四寶贊

吁嗟乎管城子伏羲畫卦甯用此秦獵中山拔其豪遂  
入中書供指使天下文明不言功免冠頓首臣老矣雖  
然區區一寸心尚有陽秋存皮裏君不見潛德生姦諛  
死褒貶者誰管城子筆

百家騰躍歸於墨老氏遺言守其黑藏之足支三十年  
著書何但盈一尺噫吁嘻黃金千餅珠萬斛何限多牛  
萊積谷沒字穹碑一點無貌暫而肥徒食肉願將餘瀝  
傾金壺洒向人間空空腹墨

漢之赫蹏晉側理數典不忘自蔡始一從左思賦三都  
洛陽價貴兼金抵嗤余刻楮近三年染盡湘東八萬箋  
覆瓿糊壁終何補此意悠悠難問天吁嗟乎雲煙變滅  
成蒼狗輸與薛濤名不朽

紙

圓璧方珪無不可金石之交爾與我居有良田鄰卽墨  
縱不封侯計亦得鸛之鵠之望眼穿禮耕義種獲豐年  
嗚呼文山玉帶疊山卜忠孝傳家一脈續鐵面御史永  
不磨史筆千秋看實錄

硯

此種題大概多作寓言作者不流入尖銳刻薄一路

斯為溫厚何國琛

是何意態雄且傑朗誦一過直欲擊碎唾壺

張凱嵩

半儒半仕半農圖自贊并序

古之遐稽博覽者為通儒建功立業者為顯仕耕三餘一耕九餘三者為良農自後世運會日衰以儒名者失實學以仕名者少真才以農名者鮮服勞若余也儒不得為儒仕不得為仕農不得為農雖有良工能圖吾形而不能定吾業吾將何以名吾圖或曰子雖自謂非儒非仕非農然於三者蓋已各得其半矣茲圖也蓋以半儒半仕半農稱余曰唯唯否否或又曰吾聞子自四齡承祖訓稍通四子書七歲就外傳讀羣經彙鈔成帙迨

成人後喜涉獵子史且子愛藏書每購善本必探尋其源委而校勘之子之於儒似得其半也更聞子鏐戰名場十赴鄉闈不第始授京職官武部者七年防京城者三年事務井井迨服官楚北檄綜釐務兼理書局雖曰非仕仕亦得其半也今者子本儒而曰非儒子本仕而曰非仕將歸田而終老於農乎子之家世居桃溪久矣溪之畔南阡北陌土厚而肥可以藝黍稷植桑麻開軒面圃春韭秋菰致足樂也惜汝老矣其能服田而力穡乎禮曰上農夫食九人其次食八人七人六人下農夫

食五人以子年已五十而筋力就衰如為農農亦僅得其半也余曰嘻得半之道豈如是其易哉書曰惟敬學半念終始典于學學半之難也孟子曰古之人事半而功倍事半之難也子將以半儒半仕半農名吾圖能不為有識者笑乎或曰子既知儒非儒仕非仕農非農矣而猶讓半之名而不肯居將何以處乎世之並不得其半者耶盍試稱之贊曰

爾性最鈍爾質最愚讀書一世畧識之無茫茫學海努力勤劬未窺奧妙敢曰半儒宦途紛沓其來如市高爵

厚祿斯世有幾退一步想我心如水豸繡委蛇亦云半  
仕家有田疇阡陌交通五風十雨時和年豐出作入息  
畚鍤是從吁嗟老矣吾不如農

處處參以活筆不死煞句下是謂文成法立中間借  
人言敘述尤為立言得體

張炳堃

五十小像自贊

是真吾耶胡不聞爾之聲抑非吾耶胡逼肖吾之形吾與子周旋久矣幼生長於閭里壯遊宦於京師今服官於楚北東奔西走僕僕風塵者已五十載而顛毛半白迄不見爾之名遂功成噫嘻吾知之矣性太剛也情太直也遇事認真嫌怨太深也居心要好肝腸太熱也此皆爾一生之疾也或謂爾好賓客爾嗜書畫爾愛花卉木石此雖雅事也亦足以招尤賈禍而爾未之察也且聞爾之抱沈疴而服參桂者曾經歲而未痊爾曷不攜



妻挈孥歸而老於田園乎老氏有言知足不辱知止不殆吾為爾勸置身身外甘為樗散庶以遠害

繪影繪聲維妙維肖徐黃妙手所不能到非但頰上

添三毫而已

張炳堃

縱筆為之慷當以慨結尤雋永可味

張凱嵩

雲板銘

并引

同治壬申二月二十日游鄂城花園山瓦礫堆  
積突出一石質甚堅緻扣之錚然音如洪鐘遂  
命土人攜歸置諸正覺寺之齋堂為雲板乃為  
銘曰

堅侔鐵響如鐘色凝黛形張弓石非石兮銅非銅不雕  
不琢完天工於何得之瓦礫中萬斯年兮懸梵宮伴清  
磬兮警羣聾

天地生物待時而出亦待人而用吾於斯石也信之

通志卷之六

藏板

彭崧毓

奇物奇遇銘亦奇警異常安得不詫為奇才何國琛  
體物瀏亮其音泠然張凱嵩

亡室鄭夫人墓誌銘

亡室鄭氏同邑莫川州同銜筠公孫女候選縣丞咸林  
公長女 誥封恭人 晉贈淑人 累贈夫人未嫁時  
咸林公謂余曰余生三女惟長女最賢幽閒貞靜與兄  
弟姊妹處終歲無詬誶聲他日歸於汝家吾知其孝舅  
姑和妯娌相夫子而無違也至工刺繡善烹調勤澣濯  
其餘事耳道光辛丑十月來歸德言容功四美畢具果  
一一如咸林公言時先大父母春秋高君隨余侍奉晨  
昏定省無少閒吾大父母與吾父母愛之如己女焉謂

鳳丹曰此真我家佳婦也汝曩所聞於咸林公者今不  
謬矣乙巳大母歿戊申大父又歿咸豐乙卯余赴都供  
職君齋糧戒行一切襍囊巾履之屬悉手自檢點為小  
摺以記之行者擔簦就道若無事焉余臨行時頗以親  
老子幼為念君執余手曰君行矣堂上白髮膝下黃口  
仰事而俯畜之妾之職也幸勿增內顧憂語云爭名者  
於朝將相公侯豈有種乎遂相與垂淚而別歲丁巳吾  
母施太夫人命攜一子一女省余於京師至則不及他  
語先告以堂上安余心喜方余之官兵部也適東南軍

事急昕夕從公罕家食君主持中饋米鹽井臼皆躬操之顧體弱善病余每勸以節勞君曰長安居大不易且樂此不為疲也踰月疹發遂卒年三十七歲訃至浙自妯娒以至臧獲皆哀泣失聲嗚呼此可以覩婦德矣生子二長宗廉附貢生娶徐氏次宗彥貢生娶王氏女四長適太學生呂正拱次適太學生徐望闡次適奉化縣學訓導許敏身次適太學生盧壽彭孫一爾昌孫女一生於道光元年辛巳十一月初三日卒於咸豐七年丁巳閏五月二十七日是年春家兄鳳翔赴京會試八月

攜君櫬旋里葬於善兒干山之原去家二里許今忽忽  
十二年矣嗟乎莊子臨喪鼓盆非人情不可近余哀君  
之與吾同苦而不及與吾同甘也爰銘以誌余痛且以  
示後之子孫焉銘曰

絜膳肅飢虞筐筥也屏華務素飭機杼也德之容容式  
有序也心之宴宴行無齟也嗚呼夫人宅於此鬱佳城  
兮以昌吾孫子

樸實真摯可謂至文無文銘辭尤古茂

張炳堃

文無溢美飭有雅音

林壽圖

正覺寺中興第一祖故正峯大師塔誌銘

大師法名紹玉字瑞峯為正覺寺住持易名正峯寺在  
鄂城東北隅明崇禎七年敕建逮今二百三十餘年其  
間香火未絕叢林久廢得正公主之為中興第一祖族  
姓余湖北漢陽縣南鄉余家堡人幼負異稟迥出六塵  
少長出家於本縣吳家山之雷祖殿禮德宗大師座下  
嘉慶己卯十二月八日在歸元寺受千佛菩薩大戒得  
曹洞三十九世一真上人法自受戒後覃心壹慮惟耽  
禪悅道光辛巳初游江南九華山山有九峯壁立千仞



舊名九子山唐李白以九峯如蓮花削成改為九華山  
山上多寺宇皆披茅為室室左右有洞修道者居之公  
自恨封於聞見靡所參究居數月遂息擔於金山江天  
寺寺在揚子江中古名浮玉山因裴頭陀開山得金故  
名公愛其形勝掛錫於茲肆力梵經研求內典靡輟寒  
暑司紀錄者二年高旻與金山毗連聞其丰采招致之  
為書記癸未始領其職時同寮漢陽僧蓮衣以文字名  
相與甚懽學書學詩互相琢磨凡主人所作參偈語錄  
必命公與蓮衣參酌期盡善而後已丁亥住甘泉天甯

寺名益藉甚公深自韜晦不領職事湔洗情塵有妙有  
非有境界戊子游京師住法源寺主斯寺者講求禪學  
凡負鉢遠來僧視其資稟清明不墮汙俗者棒喝愈嚴  
公力請開釋雖屢被詆訶而參謁丈室如故主人亦殷  
殷誘之嘗語諸僧曰吾輩棄鄉井離父母所學何事學  
參禪耳如某者可謂專心致志得正法藏覺異日提綱  
唱道黼黻宗門者必此人也京師地方繁盛凡縑流稍  
通文字者無不與士大夫游公獨恪守風規不炫金玉  
綺繡之華不識朝右公卿之貴一衣一鉢了無罣碍居

法源數載足未嘗出戶限人以為難迨丙申游五台五  
台山者曼殊大士之闕宅五嶽環拱山橫雁代國  
朝定鼎之初佛風丕振天眷迭膺公得幻住其間

頓悟大道虛空本無迹象千潭一月宗旨豁然由五台  
而歷華山登崖陟險如履坦途蓋行腳二十餘年極行  
雲流水之樂矣咸豐初念其師春秋高始歸里仍住雷  
祖殿殿與歸元寺近歸元住持聘之司首座職殆六七  
年戊午己未間粵賊蔓延湖南北勝地化為邱墟佛教  
頓敗公偕其徒林茂及徒孫等避亂山中獲免同治初

元粵賊殄滅歸元監院本源師募化重修招集禪侶請  
公為住持不允復請公為首座仍舊職也每歲戒期開  
釋後學非公不辦乙丑棲賢寺闕方丈欲聘公公辭甚  
力舉續清上人主之而為之贊宣其教閱二載公始移  
住紫霞觀年逾七十矣觀在鳳凰山上去漢皋十餘里  
絕無市井塵喧獨處一室晝夜坐禪至老弗倦余自丙  
寅來鄂己巳重修會垣正覺寺殿宇初成訖無主者始  
招蓮衣居之越壬申四月開叢林蓮衣厭煩惱移寓於  
雄楚樓始招公為正覺寺主堅辭再四余親履紫霞者

三乃首肯年垂八旬八月十七日進院從者數百人遐  
邇聞之咸稱為有道長老公性情和洽心地慈悲每與  
禪侶商酌寺中規模及升座說法反覆開導無疾言遽  
色居恒日未辨色則起夜至漏三下始假寐余公暇造  
其室常語余曰釋教之衰至今尤甚今年正月得維那  
明道師領袖羣寮此心稍安每日課誦必上殿齋供必  
過堂朝夕劬勞若忘其倦自奉甚儉約終年壞色衣未  
嘗離體日飲惟功德一勺水經鉢以外無他念也嗚呼  
難矣公未歿先十日作一偈自一字以至十字其意勸

人遠利名求道德為千古度世金鍼三月四日偶示微疾初七日黎明命侍者促余至榻前而言曰僧之來也因緣而來僧之去也緣盡則去吾殆將死矣少頃命侍者扶下榻袖出素紙囑余書其衣鉢語畢卽上榻兩序禪侶環立其旁公喚維那師明道來榻前授以法命其名曰法源詔之曰此中興第二寺主也善守之毋拂吾意囑竟合掌趺坐至辰刻瞑目而逝公生於乾隆五十七年癸丑十二月十四日世壽八十有一僧臘六十餘示寂後停龕三日面如生異香滿室見者無不仰慕讚

歎余獨悲公與蓮衣皆近今禪林之龍象蓮衣雖稱善知識顧猶未化人我相公則樸實純白不立厓岸皈依者日益衆余方幸津逮得人乃蓮衣以正月二十日示寂而公旋繼之蓮衣與余香火緣最久公則相處未及一載遽爾怛化於公固得大解脫然余之觀居人世者其能無俛俯今昔之戚耶公弟子主歸元寺林茂禪師行茶毗法遠近諸刹聞之來送者數百人火化之夕光燄成五色其齒牙頂骨不壞者舍利羅交綴於上以是年月日取其灰燼貯以寶瓶歸瘞於馬家湖之麓余為

之建塔其上而縷述其高行俾繼起者有所取法焉乃  
為之銘曰

道光明行敦篤貌春溫性秋肅勁如松淡嫵菊月印川  
雲栖谷十二時泊無欲振宗風此尊宿去來因電光速  
撒手歸香盈屋有遺言忍卒讀願來者踵芳躅

洋洋灑灑一氣噴薄而成而曲折動宕仍是陽開陰  
闔之勢如建章之宮千門萬戶自有逕路可尋是為  
文章大觀

張炳堃

文字極簡淨敘次極詳盡此佛法中所謂不增不減



也有點綴處有斷制處純是古文家法絕不墮入釋  
典影響語中間入蓮衣處尤得附傳之法賓主秩然  
是為力大心細

彭崧毓